


天一閣藏明代方志選刊


天一閣藏明代方志選刊

袁州府志



20417

一九六三年十月上海古籍
書店據寧波天一閣藏明正
德刻本景印原書版框高二
一·五公分寬一四·八公分



袁州府志序

夫府志者志一府土地所該之事古今已往之迹以布今傳後而輔於有政者也袁舊有志亦有續編舊志失之繁續編失之畧况歷年旣久其間不免有脫

誤殘闕之弊讀者病焉成化初
郡守永平劉君懋銳意脩述爰
命文學司訓陳定損益成集刊
存迄今餘四十年矣而弊復如
昔弘治末郡守川東朱君華毅
然以重脩為已任迺命文學司

訓劉案搜葺編摩百凡仍裁決
於朱稿僅成會朱以憂去遂已
繼朱而守者乃慈溪姚君汀爲
比至適太史嚴君嵩在告家居
姚乃走書鈴岡以志事為懇而
以郡生歐陽誠輔之未幾姚又

以事去志亦弗克就緒嗚呼事
之成其難如此其亦有待也哉
正德癸酉冬武邑徐君璉繼守
於茲君蓋剛果明決焉者一自
下車宿弊剗而百廢舉因訪郡
閩典莫此爲急仍走書詣太史

促其成凡館穀筆劄治書鈔梓
之費皆君自區畫而民無所與
志成徐君謂予與張中丞皆郡
人宜各有序顧予學識荒陋而
語齒自不容辭乃僭序諸首曰
袁自禹貢歷漢晉唐宋以來郡

邑名稱因革不一肆我

太祖高皇帝肇造區夏混一海宇
乃定為府其領縣有四其疆域
界限千數百里其山川形勝為
江右上游其生於斯若陳重廬
肇鄭谷彭俞輦其仕於斯若韓

愈李德裕祖無擇周惇頤輩輝
映前後具載

英宗睿皇帝大明一統志及郡舊
志似今無誌可也然而

累朝

聖化漸摩神功默運日積月累而

代與人殊是以風俗以漸而隆
戶口以漸而增生息以漸而繁
文章以漸而盛科甲人物名宦
之輩英騰茂者以漸而日倍於
前今志不脩則其文獻無足徵
矣孔子以夏殷之禮吾能言之

而有杞宋不足徵之嘆然則使
後世以吾郡為無徵而不言焉
是誰之過與徐君於是蓋籌之
熟故畢力其事焉矧得太史三
長之筆而成一郡之書宜其事
必核詞必正類例必審闡忠節

於淪謝之餘微怪誕於趨尚之
頃政蹟有裨於治化者存之詩
文不繫於名教者黜之所謂舊
志之繁續編之畧者則無矣是
使吾袁四境之內千數百年之
間之事迹可按籍而知而文獻

不至於無徵其輔於有政者豈
淺淺哉予適際其時獲附名其
間而復託一言以為引抑何幸
與至於徐君崇文教脩武備息
囂訟完冊城濬壅渠重儲積新
廨宇諸政不朞月間而併集宜

其不勝書也而嚴以書法涉嫌
於見任故未之及將見繼嚴而
有作者詎能遺詎能遺予不佞
末復贅此誠亦有待云耳

正德甲戌季秋之吉

賜進士嘉議大夫都察院右副都

御史前奉

勅提督撫治鄖陽等處地方郡人
劉琬書

重脩袁州府志序

郡有志猶國有史也古者列國皆有
史晉乘楚檮杌魯春秋是也後世作
於朝廷者曰史於四方者曰志

明興四方之志益爛然矣法雖與史異
而疆域見焉土風物產著焉創建詳